

16 OCT 2002

Mahathir-Lawatan (Bergambar)/I
DR MAHATHIR BERLEPAS KE INDIA

KUALA LUMPUR, 16 Okt (Bernama) -- Perdana Menteri Datuk Seri Dr Mahathir Mohamad berlepas ke Hyderabad hari ini untuk melakukan lawatan enam hari ke India, Pakistan dan Arab Saudi.

Dr Mahathir, yang diiringi isterinya Datin Seri Dr Siti Hasmah Mohamed Ali, berlepas dari pangkalan Tentera Udara Diraja Malaysia (TUDM) di Subang dengan pesawat khas pukul 1 tengah hari.

Timbalan Perdana Menteri Datuk Seri Abdullah Ahmad Badawi dan menteri Kabinet adalah antara mereka yang hadir untuk mengucapkan selamat jalan kepada mereka.

Semasa di India, Dr Mahathir dijadual melawat Pusat Kejuruteraan Teknologi Maklumat Hyderabad (HITEC City), yang dianggap sebagai "Silicon Valley" India masa akan datang.

Dr Mahathir kemudian akan menuju ke New Delhi (17-18 Okt), dan dijadual menemuai Perdana Menteri India Atal Bihari Vajpayee dan Presiden A.P.J. Abdul Kalam di ibu negara India itu.

Dr Mahathir akan melawat Pakistan pada hari Jumaat dan Sabtu, diikuti oleh lawatan ke Arab Saudi (19 hingga 21 Okt).

Di Pakistan, Perdana Menteri dijadual melancarkan sebuah stesen jana kuasa Tenaga Nasional Bhd (TNB) dan menyaksikan majlis menandatangani dua memorandum persefahaman (MoU) antara Malaysia dan Pakistan.

Dr Mahathir juga akan mengunjungi Presiden Pervez Musharraf di samping mengadakan perbincangan dua hala.

Semasa lawatan ke Arab Saudi, Dr Mahathir akan menyampaikan ucapan pada seminar mengenai "Wawasan Ekonomi Saudi Sehingga Tahun 2020" di Riyadh.

Beliau juga akan mengadakan dialog dengan tokoh-tokoh korporat pada majlis yang dianjurkan oleh Majlis Perniagaan Saudi-Malaysia.

-- BERNAMA

LES AHH NMO